

# Git mke'a Judas wit Jesucristo

*Le'a Judas mtenxe'a bexa nak xmen Cristo gap bexa cuent ndo' bexa ndun ta lid le'a nak, bexa nlad uche'a di'izh ten Dios. Le'a bexa wa ndab le'a ta na mtsu'u Dios be ke ten be men, ta we'e syo'o gan gun bexa guni'i xta'an nlad bexa. Le'a Judas mtenxe'a be xmen Dios ula'ach bexa lá gaila' bexa ndo' be ta nluu bexa wa. No ndab xa ulat bexa be men ngwaila' ndo' ta lid le'a nak nluu be men ugap wa.*

---

## **Judas nidi'izh ndo' bexa na mti Dios**

<sup>1</sup>Le'a na' ndee Judas wit Jacob, ndun na' ti'in ndo' Jesucristo. Nke'a na' git ndee ndo' bego nak xmen Dios. Le'a Tad Dios le'a mti bega li gak bega xmen xa, no nla'ach Jesucristo bega. <sup>2</sup>Na'ab na' ndo' Dios le'a xa mas gunkwea' ladna bega, no mas wen yoo ladna bega, no mas ikea ladna Dios bega.

## **Bexa nluu ta na'anpa gealngea**

*(2 P. 2:1-17)*

<sup>3</sup>Bego amig ten na', le'a na' uzhebpa nlad uke'a dub git ndo' bega, cuent ten ta na ngo'o Dios beuna ndo' be ke ten beuna. Nsak na' le'a na' nsabndo' uke'a ta ndee ndo' bega, ndontsa na'anpa ula'a bega uche'a be men di'izh ten Dios. Le'a di'izh wa ta ndangea ladna beuna, ta na msa'a Dios dubtsa biau' ndo' beuna nak xmen xa. <sup>4</sup>Li ndáp na' geal le'a lat bega ba' uyote pla bexa ndab le'a nak xmen Dios, ná le'a bexa na'anpa ta ugea nak ta wa. Le'a bexa wa nkwi'in ndab geal ta na nkwea' ladna Dios bexa wa, ta we'e syo'o gan gun bexa guni'i xta'an nlad bexa. No ndab bexa le'a Dios na'anpa dubkama nibe'e beuna, no na'anpa nak Jesucristo

Xwan beuna. Parea polkata nkeani'i di'izh ten Dios le'a Dios utsaksika bexa na li ugap ndadi'izh wa.

<sup>5</sup>Le'a na' nlad utse'a ladna bega stub biaj xte'e ulo'o Dios bexa Israel, bexa nak xmen xa ndo' ya'a bexa Egipto. Cha tso'o wa mnitndo' Dios bexa na mla'a ta na nge' ladna bexa Dios.

<sup>6</sup>Le'a ta wa lak ngwasea be angel tiemp polta, le'a bexa mla'a sa msa'a Dios unibe'e bexa. Le'a Dios cha mtsa'ab bexa wa sa uzhebpa ukaw, sa nchonyaw bexa idub tiemp, gast gal wizh utsaksi Dios itea bexa ugap nak. <sup>7</sup>No btse'a ladna bega xte'e mbin bexa uyo'o gezh Sodoma no Gomorra no be gezh nde gax sa wa. Le'a be men wa uzhebpa ugap ngok, mgal bexa be men na'anpa xa ten bexa, no mbin bexa sianta be ta ugap ltsa'a ta wa. We'e le'a Dios mtsaksi bexa ndo' gi' ta nunk lá yu'u, ndontsa ini'í be men le'a Dios ntsaksika be men ugap.

<sup>8</sup>No liga nak bexa ugap ncho lat bego ba'. Le'a bexa wa ndun be ta'a nche'atsa ladna bexa, no ndun bexa be ta nladtsa bexa, be ta bzhi'ik. No ngobi bexa be ta unibe'e Dios, no kwea' ní'i bexa ndo' be angel. <sup>9</sup>Le'a zha na ngut Moisés le'a angel Miguel uteyono maxu'u ná ton go'o Moisés. Le'a Miguel wa le'a xa nibe'e lat be angel, parea ni lá ngun xa rages kwea' ini'í xa ndo' maxu'u. Le'a Miguel ndi ndabtsa ndo' maxu'u: “¡Le'a Dios utsaksi lu!”

<sup>10</sup>Ná le'a bexa ugap wa nisi be ta'a lá nyakbe'ena bexa. Le'a bexa wa nak cuent be man, nchando' bexa be ta'a, ná le'a bexa ni lá nyakbe'ena-yá. Le'a ta na li ndun bexa wa le'a gun initndo' bexa. <sup>11</sup>Pro'ob bexa wa, le'a bexa ugap nak lak ngok Caín. No ndun bexa ta ugap, ndontsa gun bexa gan med lak mbin Balaam. No gat bexa lak ngut Coré xa ngokloo ndo' Moisés.

<sup>12</sup>No ugap ndun bexa gor nzhealbe bega ndaw bega. Nten ladna bexa ndaw bexa no ndo bexa, parea na'anpa ndap bexa mod ndo' be ltsa'a bexa, ndi ndun bexa ta nladtsa bexa. Le'a bexa wa xa na'an xti'in cuent be xkaw ndo'o mbi ta lá no'o gi. No nak bexa cuent dub ya bid ta mgi'ibla, ta lá yoota gan usa'a ngus. <sup>13</sup>Le'a bexa wa ugi'i nak cuent golp ten nitsdo'o, cuent bchi'in ntsa'ab golp ten nits wa li udalad nak ta ndun bexa. Le'a bexa wa nak cuent be mbeal usabgix ni lá ini'í pa isob gibe'a ba'. Ta we'e le'a Dios utsaksi bexa, ya' bexa sa ndon le'a ukaw idub tiemp.

<sup>14</sup>Le'a cuent ten bexa wa le'a Enoc xa ngok isaga'ad xkwa'a be men uyo'o tso'o na uyo'o Adán wa mbidi'izh xa sakndo' Dios, ndab xa: “Bla'ach bego, le'a Dios Xa Nibe'e nseano uzhebpa kwa'ad luzh be angel ten na, <sup>15</sup>gab xa ndo' kadga be men xte'e nak ta ndun bexa. Cha utsaksi xa itea bexa ugap nak, le'a bexa uzhe'eb be ta ugap ndun, no uzhe'eb nisi bexa Dios.”

<sup>16</sup>Le'a bexa wa xela ní'i ndo' Dios, no nisi bexa itea be ta'a, no ndeseakwa'an bexa be ta nladtsa bexa. No zhin ndadi'izh bexa, no utsin ní'i bexa ndo' be men, natsa gun bexa gan be ta nlad bexa.

### Judas mtenxe'a be men

<sup>17</sup>Ná le'a bego be amig ten na', btse'a ladna bego be ta mbidi'izh be apostol ten Jesucristo Xwan beuna. <sup>18</sup>Ndab bexa ndo' bega: “Le'a be wizh lult ndee yoo bexa gun usalad no sian be ta'a, no gun bexa be ta ugap laktsa nlad bexa.” <sup>19</sup>Le'a ta wa bexa na nlad uteltsa'a be xmen Cristo. Sbe'en ndun bexa laktsa nsak ladna bexa, no na'anpa ncho Espíritu ten Dios len lado'o bexa.

<sup>20</sup>Ná le'a bego amig ten na' nsabndo' mas ige' ladna bega Cristo, no bidi'izhno bega Dios lak ndakno Espíritu ten Dios bega. <sup>21</sup>Lá yalad bego ta na uzhe'eb nkwea' ladna Dios beuna. No list ute bega gast gal zha usa'a Jesucristo gealnaban nunk lá idub ndo' beuna, le'a xa uzhebpa utsin ndanno beuna.

<sup>22</sup>Btenxe'a bego bexa na lá ini'í ná xta'an nsabndo' gungea ladna bexa. <sup>23</sup>Gokno bego bexa na ndaila' ndo' ta ugap, lak ngo'o be men dub xa len dub ní'i nsayol'. Bkwea' ladna bego bexa ndun ta ugap, para bla'ach bega le'aka bega ndontsa na'anpa no bega gaila' ndo' ta wa, cuent dub ta'a gast no xab bexa wa ta bzhi'ik.

### Ta lult mke'a Judas

<sup>24</sup>Le'a Dios sun gan lá gaila' bega ndo' be ta ugap, no sun xa gan iso' bega ndo' xa iten ladna bega no umbi'i gak lado'o bega. <sup>25</sup>Le'a xa wa dubkama nak Dios, xa ndon le'a ndák, xa ulo'o beuna ndo' be ke ten beuna. Le'a nat no idub tiemp gab beuna le'a Dios nak xa ndon le'a si'il, no xa ndon le'a juert, no xa ndon le'a nibe'e, no xa ndon le'a nsak. Lika nak-a.

Las ilustraciones de las páginas 4, 6, 10, 24, 27, 44, 51, 83, 90, 92, 95, 96, 108, 126, 144, 154, 159, 161, 170, 183, 195, 221, 224, 242, 251, 253, 276, 286, 305, 308, 314, 318, 320, 324, 340, 346, 354, 355, 360, 368, 370, 374, 391, 398, 399, 493, 524, 555, 567 y 645 son propiedad de ©1978 David C. Cook Publishing Co., y son usadas con el permiso correspondiente.

Las ilustraciones de las páginas 64, 66, 131, 279, 330, 421, 426, 488, 497, 515, 583 y 585, por Louise Bass, son propiedad de ©The British & Foreign Bible Society, 1994.

Las ilustraciones de las páginas 296 y 641, por Horace Knowles, son propiedad de ©The British & Foreign Bible Society, 1954, 1967, 1972, 1995.

Primera edición  
El Nuevo Testamento  
Zapoteco de San Vicente Coatlán  
zpt 14-105 5C  
©2015 Wycliffe Bible Translators, Inc.  
Versión electrónica ©Wycliffe Bible Translators, Inc. 2015  
[www.scriptureearth.org](http://www.scriptureearth.org)

Usted es libre de: Compartir – copiar, distribuir, ejecutar y comunicar públicamente la obra bajo las condiciones siguientes:

Atribución. Debe reconocer los créditos de la obra de la manera especificada por el autor o el licenciante (pero no de una manera que sugiera que tiene su apoyo o que apoyan el uso que hace de su obra).  
No comercial. No puede utilizar esta obra para fines comerciales.  
Sin obras modificadas. No se puede alterar, transformar o generar una obra derivada a partir de esta obra.

<http://creativecommons.org/licenses/by-nc-nd/2.5/mx/>